



SIARAN MEDIA (UNTUK EDARAN SEGERA)

RM120,900 DISALURKAN UNTUK BANTUAN *TOUCH-POINT* BAGI SEKTOR AKUAKULTUR DAN NELAYAN DI PULAU PINANG

GELUGOR, 18 JULAI : Jabatan Perikanan Malaysia (DOF) telah memperuntukkan sebanyak RM120,900 bantuan *touch-point* kepada penternak akuakultur dan nelayan bagi tahun 2017.

Ketua Pengarah Perikanan Malaysia, Datuk Ismail Abu Hassan berkata, peruntukan *touch point* dari kerajaan persekutuan ini akan disalurkan kepada kira-kira 124 orang yang terdiri daripada pengusaha akuakultur dan juga nelayan dari beberapa daerah di negeri ini.

Ismail berkata, bantuan ini diharap dapat membantu mengurangkan sedikit sebanyak kos input akuakultur yang semakin meningkat mutakhir ini. Selain daripada itu, bantuan *touch point* kepada pengusaha akuakultur juga bertujuan untuk menggalakkan usaha para penternak untuk terus mengeluarkan ikan demi memastikan bekalan ikan dalam negara sentiasa mencukupi. Bagi nelayan sungai dan nelayan laut pula, pihak jabatan memberi bantuan dalam bentuk input seperti pukat, Sistem Navigasi (GPS) serta tong insulasi bagi meningkatkan hasil pendapatan nelayan, ujar beliau lagi.

Ismail berkata kepada media selepas merasmikan Hari Bertemu Pelanggan dan Penyampaian *Touch Point* anjuran Jabatan Perikanan Pulau Pinang di sini hari ini. Turut hadir sama Noraisyah Abu Bakar, Pengarah Perikanan Negeri.

Dalam majlis yang sama, Ismail juga mengingatkan para penternak agar sentiasa mengamalkan Amalan Akuakultur Baik yang bertanggungjawab dan mesra alam. Melalui amalan ini, ikan yang dihasilkan adalah berkualiti, selamat untuk dimakan dan seterusnya mengurangkan impak negatif kepada persekitaran.

Ismail juga menyeru para nelayan-nelayan supaya dapat memanfaatkan hasil perikanan yang sediada di negeri ini dengan baik dan sentiasa bertoleransi. Contohnya dalam situasi kehadiran siput retak seribu di perairan Seberang Perai Selatan baru-baru ini, merupakan satu anugerah Allah kepada semua. Kutipan untuk dua (2) sesi pembukaan lesen siput retak seribu yang menunjukkan hasil 1,920 tan metrik bernilai hampir RM 4 juta. Pendekatan 'situasi menang-menang' di kalangan nelayan, penternak akuakultur, penduduk setempat amatlah penting dalam memastikan ianya dapat memberikan kebaikan kepada semua orang, tambah beliau lagi.

Suwardi bin Idris, 44 tahun, yang ditemui media melahirkan rasa syukur di atas keprihatinan agensi kerajaan persekutuan seperti Jabatan Perikanan membantu kumpulan sasaran di negeri ini. Dengan bantuan *touch point* yang disalurkan ini membolehkan beliau memperoleh pendapatan bersih kepada RM1,500 sebulan, jelasnya lagi.

####

Sebarang pertanyaan, sila hubungi :

Unit Komunikasi Korporat

Jabatan Perikanan Malaysia

Kementerian Pertanian dan Industri Asas Tani

No. Tel : 03 – 8870 4234

No. Faks : 03 – 8881 0343

Email : ukk@dof.gov.my ; pro@dof.gov.my